

缺 P1-P3



厚魏唐人少字六

朝者也曰白隆壽

心为高古勉子

讓侯晦游揚山

濟書者有身一旦

海長江迤北園

強者多力之堪觀

斗極宮回之

物謂之曰壯

此與古人以賦

三朝也拔授制而

未竟乃出其平

月六
日心為心遠是

詩以清正正於余

三讀之而研心皆

為其亦洗鉛

帚獨掃子與知

孟嘉物之清遠

如王之用乎法之

非惟如少乃素加

州之徒律如劉

陳州乞此後而

又如明道家法

訪視便備也

最爲浪浪云云

且如性乳閑理

七美九漢侯者

在凡培培以

市日之年培

者之於法也

如屈法法此時

其時則為甲都

無甲之文彼

區二有身必蓋存古

人者其於人念如

道而食失之矣

庚申日躔

星紀之次

初親

起於多

之



心遠堂詩序



梁溪鮑子讓侯抱書遊國門
示予心遠堂詩讀而異之寡
贈謁酬應之篇多溪山獨往
之咏清超醞藉蕭瑟崢泓風

雅遺音也客居半載日閉門
古寺炮寒酌苦嘗以吟嘯自
娛至和古詩十九首及卽席
諸作皆刻燭而就敏捷過人
梁溪固多才若讓侯者風氣

日上追踪明遠名不當與第
二泉埒矣栢鄉魏公一見心
許爲風塵外物欣然貽書不
佞以得佳士相聞恐予或未
之知也昔楊文公與韓魏公

云昨夜有進士蔣堂携所作
文來極可喜不敢不布聞蘇
文忠跋之云夜得一士且而
告人察其情若喜而不寐者
夫吐握之風今天下高栢鄉

以讓侯才自當爲東閣竒士
稱首而吾獨謂公古道照人
汲引後進之心尤過於昔人
數等也蓋韓公當國而文公
爲之客舉賢以助夾袋義則

應然今公方秉鼎軸人士歸
之若衆流之趨海而顧出其
所知以告予是以溟渤之大
逆施於涔蹄也自非緇衣之
深曷克以語此讓侯勉之無


負當世鉅公知人之明哉

康熙戊申冬日淮南年家友

人龔鼎孳題

合肥縣人十六歲中進士
十八歲選新水縣知縣

張鵬翔進院之座師屢任廷選日
講官



心遠堂詩序

鮑子彙其詩刻成以授予予讀之
覺白雪片片墜窗几不旃檀而香
非綠綺而韻未茗飲而喉吻津津
然若秋英之潤於齒是鮑子集衆

品而餉予也蝸廬之塵一掃矣夫
騷壇濫觴茲其流極之會哉童豎
操觚高自標置頡頏漢魏極詆齊
梁哀之成編木之盈架然徐而問
其性情則何有嗟夫指鋤爲金指

魚目爲夜光烏乎可古之國風諸
體備矣秦之雄剛鄭衛之艷冶唐
魏之簡質非不造其至也然不能
過二南唐之三際衆妙臻矣沈宋
之新聲王子孟之清雅盧李之鬼怪

非不擅其獨也然不能高李杜則
性情之發於天者雖皆才人彼獨
無銖黍之異乎往見劉邵人物論
曰一至一依謂之偏才中和之質
平澹爲妙取以衡詩直其然歟今

鮑子有托而吟所見諸什感嘆不
以激烈愉懌不以流澆工緻不以
刻鏤靜淡不以隱澁無俟乎偏至
以競能而所以移人之情者遠矣
他日者倘邀山水之靈蟬蛻纓組

將與鮑子芒鞋竹杖遍五嶽而尋

詩

三韓吳興祚題於聽松軒



序

余嘗論次邑中前賢之詩而知吾邑之詩真以古人為師其源流不可不講也百年之前士風醇朴英流後民多俯首帖括不工詩律其工之者類皆高賢宿德用以抒寫性情涵詠

化其為詩但知師法古人於當時所
尚每不暇顧雪林先生於元末與
楊鐵崖諸公為友鐵崖之詩為一時
推重而鐵崖以才雪林以韻絕不相
類二泉先生與何李同時無一語似
何李者即與李茶陵謂之師友淵源

亦未見其強合茶陵也王仲山葉鴻
山施子羽三先生之時王李之學盛
行天下靡然從之而三先生之詩又
若與之背而馳者大約吾邑前賢之
詩不襲故常不徇時好清真簡遠蕭
然高寄於當時無赫々之名至於今

歷久而為天下所貴重不獨吾邑為
然也近數十年邑中之詩多有入於
竟陵之學者然而先輩之流風餘韻
不泯於人心或學而即悔或久而悔
其溺而不返者不過一二人焉十餘
年來此道愈明英才輩出多能發事

聲律動以古人為師蓋彬彬乎盛矣
讓侯鮑子少負雋才久不得志益致
力於詩其詩清醇高雅瀟灑絕俗嚴
子孫友復稱其才思傷於頃刻千言
然而不襲故常不徇時好誠可謂善
學古人者也然學者生於數世之下

稱述前賢之遺緒以期共進於古人
而益失其源流者又當不獨以其詩
余因序讓侯之詩而發其意如此
康熙丁未中秋同邑弟秦松齡書於

青鳳軒



心遠堂詩

梁溪鮑鼎銓讓侯氏著

五言古

遊鄧尉山

揚帆下平流朝雲滿川澤前山去尚遠已見梅花白
驚風起廣川白日忽無跡捨舟陟平崖悠游理輕策
花香吹春衣風景還如昔曠望天地內芳草已籍籍
啾啾林中禽冉冉田間麥雪色盡千林誰爲幽人宅
迤邐行且止予心怡以懌數里來鐘聲猶與此峰隔

嗟峨見樓臺蒼蒼隱松栢紺宇明琉璃丹楹耀金碧
山僧向我迎還飲以玉液深殿來清飈孤雲生片石
振衣歷高閣浩蕩吳閫陌湖氣淨如練巒影斷如劃
徘徊感興廢烟波渺少伯吳宮舊花草事在徒可惜
我來謁上方因做謝公屐此遊已重過藤蘿猶在壁
坐久萬慮空愧我塵中客巖谷皆雲烟忽焉日欲夕
鳥歸衆壑幽霞明千嶺赤深山自古今此意良不易
浮名亦何爲祇以遂所適

秋泛值雨

水色何浩蕩菰蒲風蕭蕭僂仰望林樾山川俱寂寥
落葉滿平原飛鳥歸雲霄岡巒雨聲來倏忽如奔潮
深淵老蛟怒潛龍鬱以驕朔氣覺漸入寒飈何飄飄
搖蕩舟力微我醉殊未消戒言命輕楫歸路雲迢迢
同何日鴻鄒可遠春申澗觀泉

雨氣散幽谷輕風生樹林山空猶鳴泉攬衣共追尋
萬壑塵盡滌草木皆幽森呼君同攀援相與登高岑
谷口石交錯澗道良崎嶇欽水聲正潺潺浚坐覺涼氣侵
奔騰走春雷滴瀝聳秋琴濯纓亦濯足聊以澄吾心

八遠堂詩 卷一 二
童子沽酒至杯盡還自斟急水更浮觴酒酣動微吟
白日漸西匿山色清且深晚鐘起雲間遙漢翔歸禽
興盡我亦還野渡烟沉沉

石塘泛舟卽事

戒舟漾清渚菰蒲滿中流泛泛將何之
言在前山遊雲影變山色蘆葦風颼颼
白鳥任去來丹嶂輕烟浮長虹偃蒼波
古木蔽林丘攬衣入僧寺萬象何其幽
日色麗飛甍紺殿烟雲留危墻半薜荔
澗壑鳴松楸清風自南來高枕何所謀
泉流響幽石鳥聲當高樓

日落山磬起雄飲殊未休登橋瞰五湖
芰荷隱浮鷗明月來林間萬里雲光收
沿溪聞蕩槳促我欲歸舟扣舷發清商
夜氣何悠悠山色靜更紫波平櫓聲柔
鸛鶴橫雲霄驚飛過前洲君意旣寥廓
我心亦優游山水皆空明莫言歸路修
回首望湖西杳渺不可求

秋盡偶步湖口卽事

秋盡樹陰薄千山落葉枯寒風振高崗
荒榛遍兔狐饑鳥啄新黍哀鴈鳴殘蘆
迴首望天南雲光散五湖波聲走危石
巨浪崩長途禾疇半傾歆草木皆已蕪

水氣混空碧山色忽有無孤帆天際來照我日欲晡
歲月既已晚憂樂亦以殊可憐田家子終歲徒勤劬

江行過燕子磯

晚過龍江驛杳渺長干橋揚帆御平流千里風蕭蕭
帝城變雲氣落日隨輕橈吳楚山色多大半沉江湖
遠渚入暝色蘆葦鴈嘹嘹振衣歷磯上日暮無採樵
豁達心目開四顧俱寂寥明月起大江皎皎無塵囂
孤亭蔭老栢蒼翠亘幾朝上有雙棲鶻飛鳴向青霄
我來發長嘯客少吹洞簫水氣渾天地雲中失金焦

漁舟漾汀下乘風自飄颻夜久天愈曠薄醉亦以消
俯聞人語響仰覺清露飄徘徊念窮達事在情亦遙
京口流浩浩北固雲迢迢下山宿孤舟悲憤動此宵
明發已百里相期慰無聊

偶成

淮陰未入漢猶是
非常倫偃仰少知己
有懷誰可言
悲憤不得時蕭條
釣江村千古有老母
高風滿乾坤
一飯豈云微不願酬
深恩知己良亦難
慷慨應常存
吁嗟當今世誰復
哀王孫

又

白雲西山來依我北窓牖
悵望如有思棄置還自守
去者既沉浮來者猶可復
事在心慮空俛仰傲宇宙
涼風起高樹幽禽鳴清晝
中夜起徘徊月光滿襟袖
牀頭吟螻蛄松下澗微溜
雲淡天宇曠葉落山容瘦
鴈聲過江臯霞光斂林岫
歲月何差池進退無所就
還來歸田園松菊猶自茂

納涼

暑氣散平野輕風動微涼
開襟坐深林夜色何蒼蒼
棲禽滿幽樹水漲盈陂塘
長天淨浮雲明月來清光
野螢飛田間冉冉新禾香
雙童發浩歌導我碧玉觴
不覺羣籟息薄露沾衣裳

遊湖中山寺

艤舟絕壁下古木環蒼藤
林巒散夕霏暝色烟波澄
振衣歷紫崖松邊坐老僧
俯仰天地濶淵嘿如無能
叩之得真旨萬象何所矜
驚湍瀉幽壑飛鳥翔高層
心澹世自輕山水還閒凭

雜感

八通堂詩 卷一 五
落日動高林微雲渡遙漢山川俱蕭條新蟬正嘹亂
鳥啼下墟烟漁宿投沙岸天際上明月中夜起獨看
援琴發清商曲終還自嘆猶是數年情時序倏已換
同顧景行夜登西城

夜久天宇曠月光滿春城登臨已薄醉四望蒼霧橫
鳥雀靜無語花氣淡不明戍樓動鼓角悄寂欲二更
暮雲暗春樹廣陌無人行老漁宿清溪風細波痕平
烟光渺山色籬落多犬聲凭高發長嘯不覺天地驚
關吏夢中起倉卒還相迎徘徊念窮達事往誰可爭

乾坤老布衣感慨徒爾生悠然歸南窓今古同此情
遊天竺山

輕舟過湖濱理策向天竺山逕來春風透迤入深谷
曠望心志怡此遊稱不速登頓路紆迴車騎有追逐
盡駭林樾疎千崖存枯木踐踏多虎狼荒涼鳥不宿
可憐山數竒忽亦遭傾覆俯仰發長嘆葱鬱渺難復
數里行山谿浩蕩如平陸雲氣變嵐光人家蔭修行
澗水瀉驚雷懸崖多噴瀑不覺法界近香風漸馥郁
山門歲月深氣象靜以肅靈谷滿琪花嵯峨隱麋鹿

八選堂詩 卷一
紺宇耀金碧妙蓮舒慧日日色麗紅幢紫靄繞殿屋
稽首拜慈雲愧我徒碌碌事在心覺空何如此樵牧
坐久聞鐘聲適以契幽獨

雨後遊冷泉亭

宿雨滿幽谷千崖聞水聲鷲嶺俯絕壑澗道何峻嶒
怪石蹲虎豹竒翠天削成攬衣坐亭北泉瀉潺然鳴
石色滌愈淨嵐氣黯不明聲從西南來老龍聞欲驚
光寒走珠玉韻細同簫笙松栢鬱以翠雲中鳥嚶嚶
凭欄面深池水流如不行冷然自今古天地應有情

滌泗正怡悅疎鐘聽復清久之萬象空不覺禪意生
仰首眺上方大半烟霧橫此行遂所期觴至壺復傾

舟過五里湖

夕陽在天末理棹下平流輕風起大川杳渺宿靄收
湖氣淨如練新蘆已颼颼四顧山色多恍同西泠遊
春事忽已去山水如可求俛仰坐林谷遠見空中樓
古寺松栢深山鳥鳴且幽搖漾過廣溪驚波激行舟
飄飄天際雲泛泛水上鷗墟烟靜村塲攬勝得自猶
此來豁心志浩歌相與酬

述懷

少年負意氣高視輕功名挾策欲濟時來往長安城
風塵歷辛苦獻賦期所明奈何願未酬議論徒縱橫
蹉跎欲三十抑鬱愧無成俯仰今古來豪傑何殊榮
憑軾傾當世談笑致公卿一言動王侯華軒列高旌
朝猶衣撻掖暮已垂簪纓昔之貧賤士何嘗不崢嶸
而我獨數竒遭逢亦變更棄置在須臾無由謁神京
著書漸頭白猶然守柴荆長沙非大地乃足困賈生
餐霞有中散飲酒同步兵區區悲憤意猶非高世情

不如鹿門隱心遠世自輕我亦從此辭一消硯礪平

阮始平

仲容固竒才放情本高寄一官不足矜世亂甘棄置
達音可云微飲酒必期醉錦綺非其願同俗亦自異
曠焉遂所適俯仰在天地區區始平稱詎當達士意

賈誼

洛陽天下才賈生固竒士年少抱經濟獻策謁天子
思欲致太平功業從此起遭逢當聖世棄置曷爲爾
淪落沒長沙痛哭正無已鵬鳥悲且鳴作賦良慘矣

八選堂詩
卷一
傷哉古名流空使吊湘水

江中夜行卽事

揚帆漾明月悄寂夜方半大江無人聲輕雲淨遙漢
同舟客盡眠推篷我獨看沿洄涉驚波觸目俱可玩
遠見山色沉烟深翠微斷平瀾接虛空清颺起浩瀚
倏忽百餘里猶覺天未旦鼓角動邗關樓櫓積沙岸
引領望金焦我心正淒婉昔遊不幾年此行良可嘆
清笳自悠揚哀鴻復嘹亂何用聞琵琶青衫已堪換

秋日山行

紛擾謝未得翻然欲山行漾舟過西浦湖水盈且明
菰蒲遞掩映菱芡相縱橫臨流靜以感已覺塵慮更
捨舟涉平郊曠望還自驚遠近赴林樾颯颯皆蟬鳴
草木盡商氣禾黍來秋聲逶迤行且徐四處涼風生
涼風吹輕衣豁達怡我情忘機叩禪舍高梧蔭前楹
坐石觀衆妙山色雲中迎林巒映朝麗蘿薜含餘清
入山掬清泉湛然何澄瑩振衣上層嶂俯視萬象輕
地曠神亦遠境空形不爭憂樂無足繫安計辱與榮
長嘯發浩歌積憤於以傾夕陽倚山巔歸鳥鳴嚶嚶

八選堂詩 卷一
沽酒向山樓消我硯礪平日日醉秋山何用矜爾名
賦得遊子寒無衣

歲月忽已暮萬木何蒼黃朔風鳴林間遊子天一方
去去不復還客路多慘傷吹沙蔽日月長途積寒霜
遊子苦行役所悲衣與裳別離已許久惆悵安能忘
哀雁鳴江天雨雪摧枯楊思君不得見有懷誰可將

遊龍淵寺

春氣滿川原草色積平壤西冷去遲遲我心正怏怏
隔林隱古剎願言以偕往涼風吹輕衣境曠胸自廣
山門歲月深河流復泱泱四顧草木蕪盛衰空僂仰
高棟留荒烟危簷結塵網虛堂無人聲但聞鼯鼠響
殘碑沒新蘚老栢氣蕭爽山僧亦寥寥來往祇自賞
跌坐靜慮生可以空幻想

三月十五夜同軋若斷橋看月

夜色靜湖濱見月喜忘寐水月同茫茫曠望心自異
與子登此橋徘徊已薄醉旣識天地別兼之以無累
數里盡雲氣兩高隱巒翠野火明沙汀禪燈渡幽寺
樹荒無鳥棲波平有魚戲沿堤來麗人月光映珠珥

復有蚩蚩者匍匐經此地所見雖或殊總可豁吾意
人生貴自適此景良不易昔之東坡公放情以高寄
可嘆今世儔誰與同其類我來對明月浩歌思往事
詩酒愜夙懷山川動遙視爾我皆此情今古亦無二
區區事軒冕烟水原自棄願言重登臨曠然起遐思
夜泊唐棲

我遊適西泠放曠無定跡懷古感山川經心戀泉石
名勝烏可窮留連未能釋相對以靜理山水皆有獲
瀟灑日縱觀寧非烟霞客我心欲忘歸奈何忽催迫

輕舟離錢塘悵望徒自惜前途去未遠已覺巒岫隔
涼風吹春林黯黯日欲夕薄暮來唐棲蒼烟生古驛
徘徊平疇間月光淨且碧遨遊曾幾何時序漸以易
雜詩

君作天南遊妾處閨中戚君遊歷山川妾戚無朝夕
朝夕日在懷念此遠行客客去今未還關河空阻隔
倚門復踟躕憂心竟何益我欲從君遊悔不爲行役
咫尺未能越迢遞豈堪適蕭條鴛鴦衾對此徒可惜
君去方初春忽焉日以積深草沒堦除新桑變疇陌

八遠堂詩 卷一 二
遨遊逐輕風君意自怡懌可識久別離鏡中人已瘠

又

朝登武林城暮宿西泠房徘徊感今古風景何蒼涼
杳杳錢塘波漠漠蘇堤楊曠望念遠人有懷誰可將
翹首不能見天涯各難忘我欲題尺書南鴈無迴翔
歲月旣飄忽况復阻河梁閒撫無絃琴殷憂結中腸

又

出郊見丘隴纍纍滿山巔人世有幾何生死多變遷
朝猶披鐵衣暮已歸下泉萬里傷征魂征魂不得還

陰風翳白日悲狐泣荒烟清明設餼俎處處飄黃錢
少婦振哭聲悲號動蒼天哀哀語難識總爾爲棄捐
彼此各有情寧肯付漠然傷哉此纍纍其能永百年

又

驅車鐘山北遙望秣陵城山川正寥濶城郭何縱橫
牛馬連近郊野田不復耕引領見百里漠漠荒烟生
往蹟不可問哀鴻有時鳴朱樓委沙礫畫閣成荆榛
悲狐啼秋原崩途咽泉聲世事豈足怪物理原變更
可憐羈旅客今昔空此情

又

蕭蕭江上雲泛泛水中草良人去何之顧瞻千里道
日暮愁空房無心對綦綰寒風起天末言歸胡不早
閨中歲月深非復顏色好豈不念別離憂傷乃終老

又

行行出郊郭輕風吹春衣曠望霽色明殘紅向人飛
鷓鴣鳴林間春日多光輝少婦攀柔桑盈筐重依依
雙鬟映春水明霞燦珠璣誰家遊冶郎走馬來芳菲
徘徊復流盼覺與心事違從容謝使君獨自歸荆扉

村居卽事

積水明川原雲光暗高樹涼飈生坐隅靜見濕陰度
昏旦聞輕雷送此千村雨雨氣溢田疇溪聲喧野渡
茫茫烟際禾漠漠山前路斜陽下茆茨清光動鷗鷺
卽此堪自娛浮榮何所慕

山齋寄友人

西山涼雨來湏臾滿浦口流雲隱城隅輕風入窓牖
林巒失朝暎川途滌纖垢蒼蘚上平塔新禾綠南畝
我閒坐高齋幽情愜詩酒好鳥鳴古槐戲魚翻碧藕

放曠期所適清景復不偶
援琴寫幽懷願言寄良友
飲香眉亭

微雨忽自至高軒送微涼
庭翠益以潤四望增清光
清光可娛人勸我千百觴
我醉客未散獨立還徜徉
登臨坐超忽境靜心欲忘
輕風從樹來夕景何蒼黃
顧此難自己浩歌以相將
留連重言歸月色盈匡床

夜坐苦熱

開窓無涼風暑氣滿天宇
草木寂不動天際月華吐
何以滌煩襟傷此情自苦
竒雲隱明河流螢入朱戶

徘徊久不寐沉沉夜方午
豈無蕭散人遙空揮玉塵
安得乘輕颺亦叩清虛府

秋熱集日鴻齋中作

亭閣無虛涼猶然苦煩燠
驕陽多在林輕風不生竹
時序變金秋炎威甚三伏
消鑠涸流泉赤雲捲林木
何爲此城隅所思在空谷
積雪憶峩嵒匡廬想飛瀑
嘗存清涼意自以舒幽獨

又

入秋天未涼大熱猶自熾
火雲積川原日色爍天地

草木無容輝林巒失青翠重簾詎嫌薄單絺不敢試
蕭爽喜無營鬱結覺多累思欲向寥廓曠然放心志
薄暮聞蟬悲微陽暗薜荔還知山雨來更送清涼至
秋懷雜詩
秋風吹白日倏忽還西馳丈夫志有爲有爲須及時
老大忽以至少壯寧自持豈無荆山璞終掩連城姿
絕代生佳人有美誰復知凡物感遭遇多自嘆數奇
努力竟何益俯仰徒爾悲

又

白楊迴風吹秋氣何浩浩月色入淡帷露華滋百草
身未歷行役曠望千里道獨來向南窓翻然恣幽討
人生貴樹立置身何不早憤鬱悲無成優游嘆終老
安得乘雲去一以舒懷抱

又

輕雷送涼雨天先忽開霽草木含餘滋樓臺映夕麗
落霞千萬狀變態不可制高槐集鳴蟬夜虫響薜荔
機息任溫涼澹然一無計始知動者勞靜焉可忘世

又

心遠堂詩 卷一 三
子期不復作伯牙寧鼓琴高山與流水千載傷人心
延陵空掛劍堂阜誰分金友道良不易此意殊古今
怒焉念知己感慨情難任

又

芸芸視衆草繁然鬱華滋霜雪一以至朝榮而夕萎
物理本難恃盛衰寧自知溪山茂松栢蒼然挺高枝
糾結生雲烟日月任差池人世貴不朽懷此歲寒姿

又

朝登崑崙巔暮整蓬萊屨塵世等蜉蝣乾坤信寥廓
披襟凌紫烟乘風駕黃鶴瞬息周八極徘徊向碧落
自非安期生誰得不死藥靜意絕煩囂道心深寂寞
元運爲推移悠然萬古樂

又

西風吹南鴈嘹唳度長雲關山日以夕黯黯驚離羣
角聲起靜夜客思愁紛紛悵望念徒旅遠覺河梁分
班生知己矣何事猶從軍

又

理棹風逶迤楊帆水清淺芙蓉一何妍采采露猶沾

心遠堂詩 卷一
波平鷗飛多天澗雲未捲溪轉路回惑蒼蒼不能辨
柳鬱徒苦辛喜我得自免聊以恣嘯歌豈日傲軒冕
愁思方殷日淫霖可奈何濕雲連屋瓦污水積滯多忠尺難移足
通衢長若河頽言逢舜日解拙更相歌 苦雨

心遠堂詩

梁溪鮑鼎銓讓侯氏著

七言古

溪泛

西山雨歇嵐氣清斷澗絕壑水亂鳴輕舟悠悠漾深
渚四望浩渺怡我情新禾滿田涼風起濕雲茫茫壓
流水野疇農子歡且歌烟簑錯落夕陽裏溪橋波瀉
大壑盈湖中神鯉多逆行渡頭紛紛打魚客金塘留
罩何縱橫我因停橈問漁父老漁暝立隔烟雨換得

心遠堂詩 卷二
河魚數十鱗烹鮮勸酒過前浦前浦蕭蕭樹色深輕
颺不動村墟陰天邊冉冉鳥飛白遠見夕靄霏高岑
幾年有心甘棄置扣舷一歌擴所寄與君還作十日
遊痛飲滄浪傲天地

春遊曲

新烟着柳柳欲眠黃鶯啼春春可憐繡閣金鋪煖猶
睡香靜雲屏花正妍芳草滿天春色裏花重錦城風
不起油壁車輕紫陌長歌聲半沸春流水越羅蜀綺
香霧濃小桃深染胭脂紅瑤姬翠袖芙蓉膩珠簾笑
語烟朦朧驕嘶紫駟踏花去花枝欲暮金堤路願君
不惜沈郎錢明日殘紅正如雨

放鯉歌

漁人舉網獲錦鱗張髻鼓鬣如有神滿身爍爍黃金
色騰躍知是非常倫鯨宮昨夜失龍子傳是銀盤飛
鱗死老龍泣走羣龍悲倏忽怒濤千萬里我喜神魚
還自生眼光四射天地驚不惜珊瑚贖君去感恩欲
語仍無聲携來春塘風浩浩雲路卽今置身早莫於
淺澤更淹留海門咫尺烟波好

月華歌

碧落無聲數萬里亂雲收去淨如水仰天大嘯發浩
歌四野棲禽驚欲起主人飲我千百杯相邀明月共
徘徊空中淺淡雲色少倏忽湧出黃金臺奇光變幻
千萬狀我呼諸君醉相望異彩出沒烏鵲飛琉璃金
碧共搖漾大海闢折青珊瑚鮫人驚避羣龍趨華清
峻潔海宇濶天孫雲錦浮冰壺古時明月今時有今
時此月安能久坐觀聚散亦何常月色盈虧自難守
俄看光怪來中天瓊宮璇室霏雲烟廣寒五色忽漸
沒銀河淨瀉仍瑩然因之此理悟無極人生良會不
易得大造文章非偶然無力挽留徒嘆息嗚呼我歌
今月正中颼颼遙漢來清風更欲借爾床頭之斗酒
一洗我胸中十年抑塞之無窮

迎春曲

青帝騎龍朔威煖江湖氣徹蛟冰斷葭籥飛灰淑靄
生東郊道上鸞旂滿曲水銀塘躍紫鱗曉烟欲上舊
條新一夜東風吹臘去綵幡剪綠賦宜春錦城綺陌
填歌吹花映晶簾雲鬢鬢五陵年少鬪紛華青蛾處

八通堂詩 卷二 三
處爭眉黛鳴鳳瑟酌金罍蹀躞香塵滿氤氳玉律回
細菜金盤傳雪圃綵花紅蠟映樓臺薄暮龍驂遊未
已羅綺深中香又起淡蕩雲光寒漸輕往來笑語春
風裏春景明春意盈使君車騎來郊迎院裏梅應早
林中蕙自生君不信東皇消息催無限先看絲絲金
縷舒青眼

過華藏寺

兩崖劃斷芙蓉分湖流一碧連輕雲拏舟突出過山
口波光倒瀉搖星文蛟龍出沒數百里巒影半沈震
澤水長空茫茫白日昏一聲清嘯怒濤起榜人紆路
入杳冥天風陣陣吹魚腥棹謳悠揚向蘆渚仰首上
見蓮花青香烟如雲蔽松柏佛火晝明琉璃赤尋幽
不來已數年禪房草暗苔空碧山僧蕭條去者多山
鳥無恙猶相歌巒壑且喜舊顏色我心徒愧仍蹉跎
蒼烟霏霏山欲暮微風不動歸帆路未得松間看月
明夕陽柔櫓時回顧

夜渡瓜州

暮雲沈沈壓江流淒清鴈宿蘆花洲中宵打鼓過磯

心遠堂詩 卷二 四
下江氣直接滄溟秋霜重南天寒欲起滿目江光如
画裏帆檣千點出雲間中流一去平如砥角聲嗚嗚
吹碧空魚龍寂寞秋氣中夜久山前吐殘月銀蟾倒
瀉琉璃宮白光茫茫蕩蕩雙槳乘風坐去如天上烟歛
明河星斗寒仰天氣欲高千丈江濱刁斗聲不聞森
森盡是水犀軍東山霏微看漸白舳艫千艘橫烟雲

田家樂

田家今年異去年去年愁苦今陶然我問憂樂何相
懸云今靈雨多纏綿去年滿野生荒烟今年溪畔皆

流泉去年六月禾已薦今年稻黍何娟娟去年拮据
良可憐今年寧煩胝與胼但看輕陰日日生長天和
風冉冉吹平田稚子乘流弄潺湲老農得醉還高眠
笛聲牛背落日邊歸來漁火盈前川槿籬桑拓葉正
妍菱塘水漲荷已圓園蔬換得鱸膾鮮妻奴燕飲相
留連夜深犬吠籬落前柴門月滿地逾偏村醪麥飯
不用錢漠漠杖藜自在還吁嗟世事安可全田家樂
事吾取焉

登虞山

無端忽入虞山遊虞山巖谷真奇幽仰見峻崢千仞
之怪石俯聞颼颼無數之松楸揮手招雲霄漢近空
中鐘磬鳴山樓逶迤登頓陟險阻恍如劍門巴峽行
人愁山前萬樹春浩浩車騎氤氳滿長道諸水直下
震澤流湖田沈沒生春草上方金碧麗嗟峨登臨吹
我松風多飛泉滴瀝走珠玉懸崖蒼莽皆藤蘿更攀
絕頂望無極海氣茫茫天地黑魚龍隱見不可窮烏
鵲參差渾莫測倚巉巖發浩歌森森杉檜滿烟霧恨
不還携白玉觴痛飲日落千山暮

關山月

老將屯營八千里鐵鼓金鉦鳴不已旌影時翻瀚海
波笳聲悲動黃雲裏關前戰士臥龍沙幾年征戍不
還家天山雪色侵衣甲塞外寒霜拂劍花蒼黃明月
出滄海思歸未得心應悔青海城邊血刃摧功成恩
賞幾人在壯士歛歛多苦顏鐵衣如雪淚斑斑戍樓
夜望愁欲絕何時兵氣淨雲關

元旦

蠟光融融日未已鼓聲隆隆聽復起一夜桃符萬戶

新殘寒消盡輕烟裏琉璃光浮琥珀紅雲屏漸覺來
春風窓前老梅寒未發蕭蕭瘦影先聰瓏我今荏苒
忽三十蠹編駒隙嗟未及仰天欲擊珊瑚枝漸愧依
然舊青笠霜寒雲重隔京華幾年猶戀蓬蒿家人生
少壯不易得曾復青門學種瓜

將之嘉興卽事

關山黯黯風怒號長河片片飛銀濤前途渺渺少舟
楫短篷獵獵飄輕舠昨夜船頭風逆起薄暮纔行五
十里未到關前日已曛兩人暫宿茅廬裏緩醉村醪
竟不眠空塔雨急聲潺然中宵忽聽風愈急心愁阻
隔舟難前鷄鳴早出過湖口茫茫水白迷烟柳頃刻
乘風破浪開布帆如箭來虎阜計程今日到嘉興舟
人衣薄寒難勝手脚凍凜行不得天光欲夕猶松陵
頻催蕩槳向南去兩手搖搖俱不語吳江城上烏復
啼前船杳渺不知處

過真如寺登浮圖

東風浩蕩柳烟紫花氣滿天幾百里迢迢高殿鬱嵯
峨日午尋幽渡溪水桑田廣陌同盤桓浮圖金碧飛

八遠堂詩
卷二
七
雲端透迤曠望情自異曲逕到處青琅玕風來寶鐸
半空響我欲登臨觀萬象凭高一嘯天地寬往來如
在清虛上下界惟多鳥雀鳴雕欄杳渺吹松聲俯視
一切但雲氣武林巖壑空中迎還過禪房看古栢佛
火熒熒琉璃赤寶花璀璨映紅幢坐覺風塵竟何益
香臺處處白玉蓮人生有意還棲禪我欲遨遊向南
去恐負今日山中烟

西湖感舊

西泠橋畔春風早蘇公堤上春光好我來乘春覓舊

遊連天烟靄仍芳草昔年此地泛輕橈湖山依舊雲
迢迢驚心歲月總飄忽當前風景空蕭蕭居人共道
繁華日浙中奇秀稱第一湖邊樂事不可窮滿傾碧
玉爲君述六橋處處桃李花輕風十里吹朝霞碧水
光中聯畫舫綠楊影裏鬪香車晶簾掩映珠樓裏繡
閣金鋪香霧起瑤笙錦瑟不曾停夕陽歌吹正無已
寶曆金鈿笑語多佳人共試雙青蛾無限盈盈映春
水花氣迷離雜綺羅王孫寶馬嘶紫陌錦袍玉勒風
流客還擁吳姬入畫船鷓絃催奏傳琥珀夜來燈火

心遠堂詩 卷二 八
映星光雕楹桂棹相熒煌一片平湖漾新月人聲猶
自滿橫塘此時樂事應嘗在誰謂卽今多感慨山水
依然冷落殊繁華倏忽愁難再試看花柳悲已無草
木刈盡千山枯縱橫滿地盡沙礫舉目四望成荒蕪
樓船簫管聽漸杳殘楊無處藏啼鳥重臺翠幙幾蕭
條紛紛士女春遊少盛衰今古自不同年年吹我惟
春風往來有情不可問茫茫悵望烟波中我聞此言
增嘆息惆悵武林舊春色還向山樓醉復吟兩峰欲
雨暮雲黑

秋日烈風不止偶成

新秋日夕風怒號悲猿哀鴈鳴江臯千年老木皆震
撼四望茅屋飄蓬毛大海吹折珊瑚樹蛟龍鬪舞滄
溟高風聲奔騰駭不絕恍如春雷鐵鼓鳴江濤空天
鳥雀亦驚避深山鼯鼠俱潛逃野疇颼颼天地黑老
農痛哭悲徒勞烈風烈風休怒號嘉禾欲偃成蓬蒿

鳴鴈行

高空鴈影秋紛紛天風吹來入紫雲上有漫漫未開
之雨雪下有關山無數之離羣霜花點蘆蘆影白干

里平沙一輪月斷續遙連笳吹聲高低更逐清砧切
天寒何事鳴且飛畏逢繒繳損羽衣誰憐雲際數聲
怨玉塞金河悲落暉燕山之來幾千里徘徊天地正
無已一夜關城聞過時千古離愁從此起八月蕭條
木葉黃蓼花紅盡烟蒼茫風急哀鳴楚天白故國天
涯俱斷腸縱橫鴈字題空碧潦倒江湖徒噓噓帝子
青天一問竒江妃靜夜驚閉蹟秋鴈鳴傷人情帶月
相呼疾凌烟過處輕碧海征人歸未得紅樓少婦夢
魂驚洞庭水澗瀟湘渺聽之處處雲山杳去歲君來
秋幾何今歲君來秋欲老來遲任意且翱翔江南卽
今多稻梁

雪中野望

村墟雲黯朝模糊草木凍凜林猶枯半空霏微滿飛
雪山川漠漠行人無雪光瑩瑩天地白四望皎潔如
水壺梅歌一聲過溪下不減舊日山陰圖

望雪歌

凍雲凜冽天地寒廣庭月黑空漫漫坐久朔氣入窓
牖天風陣陣吹琅玕堦前浙瀝痕漸積瓊飛一夜疑

八遠堂詩 卷二
盈尺朝來登樓四望賒已見千山萬山白玉女峯頭
散六花琉璃片片明朝霞鳥雀無聲凍不語草木皎
潔同光華地爐融融火未暖寒威亦覺酒力緩興至
欲題白雪詞叵羅琥珀應常滿

七夕篇

水澄露濕芙蓉冷小苑虛庭度雲影依約晶簾瑪瑙
寒栖鴉簌簌飛金井遙空耿耿見明河盈盈相望成
蹉跎冰蟾老兔忽淨皎霜飄機杼催停梭銀潢東瀉
若海水雙星飛渡清波裏雲駟鸞珮響玳瑁誰信太
虛隔萬里晚風送雨入針樓麝旆香靜花房秋一夜
吹笙向碧落人間仙路同悠悠玉壺箭永夜方半城
上烏啼天又旦

湖西觀打魚歌

朝來城西湖水清携罩往入金塘津悠悠蕩槳烟波
渺舉網遂得松江鱗一去湖中三十里綠簑風細正
無已萍蕪搖亂不可言水鷺沙鳧驚盡起大魚擁得
入我舟小魚脫却何悠悠魴魚潔白如銀色神魚騰
出同飛鷗水珠濺瀉船頭濕老翁獨踏孤舟立滄浪

水深深幾何挺又復向洪濤入衆魚捕得何紛紛漁
家稚子歡歌聞白蘋細雨前溪暝欵乃一聲歸暮雲

來悅樓

鴻溪浩蕩翔春風嵯峩高樓接太空空中百尺霏雲
霧古今花縣誰與同雕楹畫棟落成早香靄氤氳散
長道登臨一覽天地寬收拾吳中好花草曲欄窈窕
凌紫烟西山九點飛窓前遠見魚龍起震澤湖流萬
頃何茫然文窓繡幙映珠玉鵬絃催奏霓裳曲絲竹
喧喧玳瑁筵瓊樓夜夜燒銀燭花映千門人意閒蒼

生瞻望多歡顏夜久鐘聲靜河漢月明秋色滿溪山
使君仙才追李白詩成笑飲酒千石興酣搥筆星斗
寒登樓賦就烟雲碧梁溪民俗近如何令公異政何
其多不信憑高同望望但聞處處皆絃歌

江上暮歸

薄暮江口烟漫漫城南烏棲棲未闌千家砧杵漸聲
急萬里關河俱影寒夜靜兵戈動平野我憐涕淚滿
雕鞍蒼黃月黑強歸去明日惆悵誰盤桓

蕪湖旅中秋夜偶成

江千秋老天宇涼鴈聲噓噓過瀟湘蘆花白盡萬木
黃半空飛露看爲霜我今客遊寄他鄉欲歸不歸心
自傷夜深蟋蟀鳴我床愁見明月來清光有懷展轉
安可忘兀坐不寐更漏長高城吹角烟蒼茫中宵聞
之欲斷腸心思故園阻河梁伊人不見天一方援琴
發歌起清商忽覺涕泗沾衣裳欲題尺書誰與將長
途黯黯空相望

心遠堂詩

梁溪鮑鼎銓讓侯氏著

五言律

初晴

不信春能霽還驚此日晴斷雲收野市宿雨在江城
柳潤青初試波寒綠漸明闌干凝望處林樾半禽聲
又

晴光浩無極初覺曉寒輕雨歇千林夜風和百里城
天心原放曠人意共分明相約東郊去應來社鼓聲

晚望

日落衆山靜輕風吹夕陰疎鐘動幽寺棲鳥歸舊林
野水暝尤合谿雲春復深渺茫望何極揮手更登臨
又

樹暗已春色山沉猶雨痕漁燈明遠浦斜照下空村
鳥去烟光合雲多水氣昏渡頭人欲靜墟里掩柴門
將之鄧尉探梅夜泊南關

共放孤山棹蕭蕭暮靄幽相逢今夕話還憶昔年遊
城郭烟千市蓬窓月一舟更闌應有夢何處是羅浮

又

尋梅還入夜幽興與君多舊嶺吾曾過茲遊意若何
烟光浮遠堞月色靜春波不覺嚴更寂明燈猶醉歌
曉發

村郭聽鷄早中流發榜聲沙邊人漸語波上月猶明
客思幾時盡春帆一水輕關河正杳渺遙指闔閭城
登虎丘塔

浩蕩望無際登臨復渺然鳥聲來下界人語接諸天
陵谷千年夢闕城百里烟蘇臺竟何處遺恨滿山川

又

直出清虛上凭高覺影孤人烟迷大野雲氣暗平湖
天地同寥廓關山共有無還瞻館娃地淒絕更啼烏
同友人過清涼禪院

何處清涼界因君作勝遊風開滄海氣日落太湖流
石磴烟雲古松堂薜荔幽坐來天地靜應是到丹丘
登飛來峰

此峯天地闢何代却飛來石壁參差過丹崖窈窕開
山雲迎海日樹色接香臺我獨登臨晚蒼茫首重回

過許氏精舍

不信春光盡尋幽郭外村輕風花滿路涼月水當門
詩酒吾何厭田園君可論坐深清意極更自拂苔痕
又

日日來幽境空村花自香風塵悲在昔農圃間行藏
樹色分青靄溪流向夕陽夜深山月上歸路正蒼蒼
初夏雨

忽已林色暝千崖雨氣浮風前歸乳燕烟際見飛鷗
花盡看猶落苔生覺更幽連朝新漲滿應泛五湖舟

又

空翠悅人意悠然我若何到山朝雨盡過水夕陽多
杳靄樓林鳥蒼茫起棹歌古堤遙望處烟柳散青莎
寶界晚眺

落日行溪口湖山正渺然夜漁明遠火林鳥宿孤烟
樹暗千村暮風平十里天壯懷消折爻止博醉中眠

又

薄暮還相望斜陽正滿山鳥歸喧樹裏人語入雲間
不覺心俱靜須知境亦閒牛羊下來處寂寞掩柴關

西橋野望

渡口溪聲急輕雲薄未開風塵同偏側烟水獨徘徊
漠漠孤舟去冥冥野鳥來雨餘倍蒼翠歸路更啣杯

同朱霞裳鄒可遠黎眉將渡碧山庄雨阻舟中
相約看山去平林靄未收輕風生野水細雨滿孤舟
榆柳千村暮蘆葦十里秋歸來頻悵望還憶謝公遊
歸燕

歲月飄零處悲君又欲歸炎涼驚變易來往悟知幾
故國雲山是關城草木非明年看社日還向舊巢飛

秋雲

秋氣正寥廓孤雲何自生捲舒高士意輕薄世人情
河漢千重白關河萬里平茂陵愁絕處作賦幾時成

梧桐

萬物感秋氣庭梧正寂寥愁吟如舊日搖落又今朝
霜重聲初下月明影漸彫漢宮憔悴甚相對倍蕭蕭

秋山

共惜山光好秋山更黯然千重皆黛色百里盡蒼烟
鳥下空青裏人行圖畫邊謝公携屐後我意欲逃禪

秋水

萬象秋光徹蒼茫水氣平孤蓬千頃碧殘荻一川明
蝦菜吾何得鱸魚空復情風塵正寥落對爾意俱清

秋蟬

蕭瑟不自昧長鳴商氣中清音來落日急響動秋風
變化吾何似孤高爾可同有懷難可問聞此嘆飛蓬

秋月

月色經秋淨清輝動暮林影來滄海碧光落洞庭深
客子十年夢故園千里心夜涼頻悵望蕭寂到如今

八通堂詩
卷三
五
秋草

憐此路傍草豈堪霜露過
淒淒金勒少浙浙野虫多
菁鬱昔誰似摧殘今若何
寧知歲寒質不朽在山阿

秋露

高秋蒸暑過玉露已瀼瀼
漸覺庭柯濕因之夜氣涼
隨風還潤物帶月欲霑裳
試上金莖望寒光正渺茫
社集鄒黎眉獨觀堂咏秋陰四律

野水茫茫白殘蘆颼颼侵飄零
餘客思搖落任秋陰
高樹雲光暗空城雨氣深
登臨重回首蕭瑟動悲吟

又

浙瀝秋聲滿蒼蒼何處村
涼風來竹屋細雨過柴門
雁渡江烟冷山沉夜色昏
十年漂泊意惆悵不堪論

又

秋思浩何極那堪雨氣連
我心旣愁絕對此益茫然
漠漠雲山路冥冥禾黍田
尊鱸猶可問應棹五湖烟
又

高秋天宇曠此際復溟濛
城郭水聲裏人家雲氣中
寒光生薜荔涼意滿梧桐
獨坐倍蕭索登臨憶謝公

八
卷
詩
三
六
秋日同周盈撫文山西浦觀蓮

曲曲蓮塘路陰陰鷗鷺飛輕烟生碧水細雨落紅衣
十里歌聲歇三秋香氣微小舟漾前浦知是採菱歸

又

水氣經秋徹溪蓮正渺茫殘香浮遠浦疎影滿寒塘
搖落隨朝露蕭條傍夕陽蘭橈何處問幽意自相將

感舊

舊日江南路今來草木秋風霜千里道離別近時愁
夜月隨邊雁寒潮送客舟鼓鼙聽漸急圻堠暮雲浮

又

馬出陽關道平堤柳色新野花頻送客山鳥故迎人
簾幙千家雨關河二月春香車滿南陌我自苦風塵
留別周盈撫

相見情何切深談到夜分風塵吾作客意氣獨推君
涼月起高樹長空捲暮雲明朝秣陵去旅雁不堪聞
毘陵夜泊

警柝生殘夜蕭然離思賒清霜鳴柝柳寒月冷蒹葭
客夢人千里故園天一涯不堪頻悵望雲樹暗京華

毘陵曉發

畫角聲聲急長河發榜齊沙汀原宿雁村場漸聞鷄
殘月催砧杵輕風聽鼓鼙曉行寒更入百里片帆低
丹陽道中

禾黍郊原白霜高朔雁飄風塵如舊日離恨異今朝
斷靄千山碧斜陽匹馬驕蕭蕭更南去衰柳暗溪橋

白兔旅中書懷

作客秋將老愁吟旅思侵一燈千里道孤枕十年心
悲雁靜方過寒蛩此更吟往來凡幾許空自愧浮沉

句容曉行

揚鞭下絕坂濕露滿征衣入路猶餘夢思家未當歸
烟中人語雜天際雁聲微始識風霜苦何如暫息機
同顧景行西郊秋望

天地盡商氣登臨日未曛松筠千岫靄蘆荻一溪雲
鳥影望中滅漁歌空際聞不堪時序易秋色又平分
臘月十五夜見月感舊

去年今夜月相約共題心事悲歡異故人聚散殊
風高鳴遠柝霜重落寒枝又是當殘臘何心對酒卮

九日偶成

時序驚飄忽，茱萸節又催。不堪重作賦，有恨更登臺。
黃菊東籬興，青山北海杯。夕陽重迴望，天際雁聲來。
同季雍介聖昭山齋卽事

登樓薄暮望，雲氣暗高岑。禾黍千村雨，川原百里陰。
涼風還對酒，幽意可鳴琴。亦是塵中侶，殊深物外心。

又

涼氣生虛屋，空天雨忽來。遠山無落日，深樹有輕雷。
積水渺難極，層陰結未開。相期臨絕澗，瀟灑共流杯。

又

暑氣散幽谷，深林嘗閉關。松風生枕簟，梅雨滿溪山。
境靜心應遠，機忘人自閒。抱琴面修竹，啼鳥滿簾間。
懷朱霞裳

又

詩酒推吾輩，何爲病獨君。自然增悵望，應覺少論文。
別恨憐朝雨，愁心對暮雲。北窓蕭寂久，何以慰離羣。
歲月何飄忽，深憐病裏過。自來經夏後，只是念君多。
細雨還滋蔓，輕風又長蘿。近傳顏色好，應共泛澄波。

除夜

歲暮只如此吾心總黯然
半生餘薄醉今夕又無眠
爆竹消殘臘梅花感舊年
兒童慰愁緒相對重留連
雨窓卽事

愁心正無極夜雨復如何
孤館涼風足空階積水多
琴書悲寂寞爾我說蹉跎
明日山泉好携樽發浩歌

又

城郭水聲滿庭昏更夕
陰芭蕉一夜雨燈火幾年心
機息情俱逸緣空悟亦深
酒酣同耳熱相與試狂吟

同伯子雲子暨子羽諸叔遊鄧尉諸山

理策尋幽勝山光積翠明
千林猶雨色數里已鐘聲
湖湧樓臺白梅藏法界清
遠公談偈處我意此逃名

靈巖山

昔年歌舞地今日只空山
舊跡青崖上禪心碧水間
風平河影直人靜鳥聲閒
寂寂松杉滿惟僧自在還
天平山

壁立摩雲際登臨路幾重
到山多白水入寺只青松
細雨歸林鳥斜陽過嶺鐘
何時謝塵事來此臥高峰

八遠堂詩
卷三
花山

聞道花山好山空不見花古墻惟薜荔深逕自烟霞
梵起高僧舍雲歸處士家相期過前嶺落日正啼鴉
觀音山

香剎松聲裏雙扉古殿幽天花隨處落法雨半空浮
石磴留雲影山藤拂澗流經行禪意靜疑向普陀遊

虎丘山塘

此地春光早鶯啼柳色斜画船皆玉管籬舍盡梅花
落日來山寺輕風過酒家與君歸正未夾路滿香車

毘陵夜泊

渡口舟初泊蕭蕭夜氣清荒村時犬吠古寺少鐘聲
雨暗千林黑風平一火明推篷更南望寂歷暮烟橫
曉發白家橋

移舟絕岸下早發過柴門人語猶然夜鷄鳴卽是村
日來山有色風靜水無痕俯仰生平事欻歔不可論
晚登寶善橋

忽到清溪口相看意澹然人行山色裏鳥去夕陽前
細柳平橋月疎鐘野寺烟長河波欲暝簫管幾歸船

又

不覺林色晚蒼烟看漸生詩人方得句山鳥忽無聲
斷嶺雲俱合平波月自明渺茫溪路白暮靄隱孤城
春盡日

時序靜中易物情皆可傷不知春欲去誰識夏初長
深樹鶯聲老高粱燕乳忙江南花事盡有意向滄浪

又

春色無端去相看盡可憐留連惟此夕惜別欲經年
花落飄羅綺鶯啼送管絃掩關蕭寂久更泛畫溪船

立夏日

物理有代謝俄驚時序新已忘今日夏還認幾分春
燕乳人初倦蚕眠婦不貧小窓新翠積藉爾隔風塵
夕陽漁棹

落日橫山色漁人亦倦留燈明沙岸夕綸捲鏡湖秋
水濶烟千頃波寒月一舟聞歌當此夜應起別離愁
村居六首

亦是幽棲者伊人水一方霜前新釀熟雨後曉炊香
稚子候柴徑老農曝短牆却忘天欲暝殘照下牛羊

八
卷三
又

竟日少塵事門開只野田
漁歸幾棹雨農過一簑烟
跡放人自遠機忘我亦閒
升沉茲已悟跌坐願逃禪
又

不是桃源路悠然若避秦
烟中春饁女月下夜耕人
寂寞偏容懶荒涼不厭貧
閉門謝時侶但與白雲隣
又

吾本塵中客來尋物外情
烟霞親妙理竹石悟虛名
漠漠溪雲白冥冥野水清
老農時共飲榮辱總無驚

又

不入城中久幽居懶性成
秋風紅葉老野望夕陽平
徑曲通樵路池深落果聲
出門遇田父閒與話陰晴
又

試覓幽棲地溪流十里村
夕陽山在屋秋水月當門
世事驚險阻農居樂飽溫
只今甘放逸閒卷自評論
過二泉書院

偶入谿深處路幽別有天堂
空猶記跡松老不知年
蒼蘚餘殘照荒碑臥斷烟
至今露臺上依舊滴流泉

八
夏
日
過
華
氏
山
堂

此地園亭好來遊分外清
薜蘿深院靜烟雨小池平
落日荷香細空山鳥語輕
莫頻溪上望鷗鷺恐相驚

又

山迥渾無暑人閑意適然
清池蓮葉雨曲岸柳梢烟
殘靄深松外疎鐘落鳥前
莫言歸未得涼月正娟娟

夏
日
山
居
雜
興

經過蘿薜處粉榭半荒蕪
落鳥風前見殘花雨後無
盛衰原物理詩酒賴吾徒
此日塵中客誰如水上鳧

又

驟雨過西嶺山山翠欲流
夜深風在竹坐久月當樓
小徑涼初透空庭香自幽
此中清興足我意復何求

又

峭閣連幽壑雲生不可尋
風塵千古夢山水百年心
入世人何切忘機我自深
隔林清磬起伴我夜來吟

秋
泛
長
廣
溪

水色清無際天光淨欲流
一溪烟柳岸十里荻花洲
落日迎山鳥輕風信客舟
遠聞漁唱起聲滿五湖秋

又

石塘水氣徹萬象盡空明雲淨山增碧風平浪不驚
深林聞梵語斷壑見人行搖漾浮鷗跡相依若有情

又

日落山色好波光接遠空鳥歸殘靄外人語夕陽中
短棹蘆花月長歌蘋蓼風經過思舊事蕭瑟與心同

又

秋色已如此吾徒將若何相携命淺棹共爾泛澄波
翠嶂留雲少輕鷗貼水多渺茫歸路杳月下更聞歌

過石塘寺懷故友張銘遠

猶是湖山勝風光異昔年松筠千樹靄蘿薜一堂烟
舊寺吾重過故人獨可憐蕭條對樽酒惆悵好林泉

又

舊徑青蘿滿曾來結比隣相尋幽竹逕不見共題人
草木山門古烟雲歲月新此中同避地今日獨傷神
夜飲山莊同朱賦遊分韻

夜靜秋陰薄風微燈影移烏歸香起處人坐月明時
玉管催歌急銀箋得句遲自多幽憤意難向故交知

又

庭虛人意靜
白露滿秋空
心事聞歌裏
乾坤托醉中
輕風生薜荔
涼月到梧桐
寂寞誰相問
浮沉與昔同
中秋夜同南侯弟分韻

秋色已過半
跼蹉事又更
可堪今夜月
猶是昔年清
簾幙花風細
關河鴈影清
蕭條說愁緒
碧玉且同傾

又

清光當此夜
徙倚畫欄東
城郭秋聲裏
樓臺月色中
笑談爾我一
感慨古今同
莫負金樽約
年來幾度逢

又

夜靜羣籟寂
廣庭月未斜
山川同一色
絃管自千家
好節還重遇
浮名敢復誇
我來頻悵望
香過隔林花

秋日郊行

水氣涵空碧
山雲薄未還
輕風稚子釣
落日美人船
紅葉幾山雨
黃花十里烟
逶迤過前樾
相望益蒼然

又

秋氣滿林薄
湖光八月澄
嘯歌惟野色
山水賴吾朋
渡口歸漁棹
橋邊坐老僧
相看放情意
身世亦何矜

心遠堂詩 卷三 同天若人弘登西山

再約看山去登臨日漸曛千林皆落葉四野盡浮雲
地迥人聲少天高秋氣分江南稻梁好來鴈已紛紛
歲暮感懷

不覺歲月晚吾徒事若何催科方雜至詩酒竟無多
未得袁生卧空留原子歌明燈問心事相對說蹉跎

又

歲暮成何計余心黯自憐詩書悲老大燈火記殘年
月裏寒梅白風前落葉懸故人慰愁况把酒重留連

探梅

歲月曾何異今朝又探梅關山仍雨雪天地半蒿萊
牢落知吾在蕭條望汝開隴頭消息近莫負共徘徊
立秋

天上餘殘暑人間報立秋露華商氣肅蘆荻暮烟浮
時序悲黃葉文章嘆白頭山川正蕭瑟莫抱著書愁
蘆荻

遠渚蕭蕭白荻蘆冉冉幽高低依水色搖漾向漁舟
鴈下江天暮花殘野渡秋半川落日暝處處暮烟浮

八遠堂詩
卷三
秋柳

江柳悲搖落驚心物候更可知難贈客無復更啼鶯
寂寞隋堤路蕭條故國情關城遙望遠疎影只蟬聲
京口旅中聞砧

作客久不返江關早鴈飛可憐驚戍婦依舊擣寒衣
夜月聲漸急秋風力欲微靜中聽愁絕遊子莫忘歸

過白公泉院

此泉今古在何處問香山名與青崖久心同碧水閒
桃花明竹嶼柳色暗松關我獨來憑吊斜陽尚未還

雨中泛舟西浦

冒雨向西浦濛濛雲氣連烟中數村樹天際一歸船
爾我曾何意湖山自渺然無聊載樽酒相與聽潺湲
雨歇

積雨聽初歇山山濕靄凝風平烟縷細日落水痕增
遠寺疎林磬歸漁隔浦燈幾年清興在詩酒總無憑
遊上天竺

路自雲中去人從物外尋香臺千樹碧花雨萬山深
境靜分天地心閒自古今上方鐘磬起清響和幽禽

天竺一道中

曲曲環丹嶂行行見化城
林荒無鳥跡山靜但泉聲
雨歇烟初歛香淡路不明
到來人欲悟愧我世中情
同七連城坐冷泉亭

樓閣空濛裏泉聲日夜聞
風開千嶂雨樹捲百重雲
放跡知惟我忘機更有君
坐看林色暮香靄復氤氳

遊石門和韻

飛蓋陵丹壑嶙嶙見石門
烟雲迷眺望山水賴評論
樹遠留春氣泉明帶雨痕
昔年曾過數歲月幾銷魂

又

曲磴盤紆上嶽崎仄徑通
夕陽隨去鳥春水暗歸蓬
詩酒遨遊外軋坤放浪中
武林留滯久百里悵空濛

又

春色明巖谷尋幽興獨違
天高人自迴地靜意俱希
徑草綠不盡山雲閒未歸
幾時重放屐同與對斜暉

再和前韻

自淡塵外意迢遞向雲門
仙跡知何處幽情相與論
細泉分竹色斷壁抹烟痕
暇日登臨興空勞幾夢魂

又

懸嗟千仞合絕徑有樵通嵐氣連高樹春風送短篷
鳥喧來壁下人語向雲中聞道晴光好猶然宿雨濛
又

到山同攬勝惆悵意多違峭閣風生易空巖花落希
靜觀期所適曠望欲無歸寂寂松杉暝春林盡夕暉

五日卽事

再放蓉溪棹濛濛尚夕陰雨多山氣濕舟重水痕深
簫鼓江南夢烟波楚客心酒酣懷古處同作短長吟

送廸九之燕

詩酒爲歡幾送君又遠行遨遊當日意離別近時情
積水連南國輕風向帝京由來重詞賦何慮少逢迎
又

又作天涯客長歌近薊都風塵原舊事意氣總吾徒
江水愁深淺山雲夢有無看君從此去落日滿征途
又

松菊猶可樂依然問舊遊飄飄爲客意辛苦著書愁
風雨人千里江湖月一舟今朝行色好吾自愧淹留

虞山歸棹卽事

百里遨遊意歸程滿曙烟雲山成悵望爾我強流連
鳥送尋花客風回載酒船故園春色好桃李亦依然

又

遊思正無極如何返舊林鶯花天際遠山水意中深
細漿風還靜長河日易沉此行題咏處有約更相尋

秋日過吳塘門

何地尋秋色平流一棹輕雨收千樹出日落半川明
白鳥飛不斷青山行處生烟波正蕭瑟還憶昔年情

